

Pɔɔlu kadasi bo i kerɛ fa maari FILIPIIYAFOM ni

¹ Mini Pɔɔlu ni Timoti bo ya ti Yesu Kristo akɔɔm ni, yere sukere ahin kadasi n ma Nyeme minem bo bu wo Filipiya mie kpiri n nu ni, na ba de Yesu Kristo na bu ni yiri ayo kun ni, fa ko tu Kristo jama mafom, ni bu bukafom kere.

² Ya Si Nyeme, ni ya Mibie Yesu Kristo buka am kere na bu ma am ahoreda.

Kabo Pɔɔlu sereeri Nyeme maari Filipiyafom ni

³ Sanga kere bo m ba tenge am jore su, m da Nyeme asi ma am wo.

⁴ Na sanga kere gusu bo m sere Nyeme ma am, m sere i ni ahorejo o,

⁵ dama fite cɛn n bo am deeri Kristo labari kpa haari ba ju ni nyuma ni, am abuka m bo ma koro akan Kristo labari kpa n jore akere minem.

⁶ Nyini ti, m la ahoresi ka Nyeme wo am do, yiri boori i bu yoori nyini sakpa ni am nu a, yiri suyo i so a, haari ko ju cɛn n bo Yesu Kristo ba kaaki ba ni.

⁷ Sanga kere am jore wo m ahore su wo, nyini ti, kabo m sunsun fa ko am do ni, wo yo daka ka m yo so. Dama am kere abuka m fa ko juma n bo Nyeme afa ama m ka m yo i ni. Haari ni bo kisa m wo dansaraka nu ni, wara sangam bo m nati m koroyanu ni, am bukaari m wo, na ma kan akere

mine ka labari kpa n ti nahore wo, adena bu yo yarada nahore su.

⁸ Nyeme di m daani ka am sa wo m ahore su sanja kere a, ka m koro am ni koro bo Yesu Kristo fa koro ya ni.

⁹ M nyemesere la ka, am sukoro am benngu buka su sanja kere, na am susi Nyeme atin n kere, na am si nahore atin,

¹⁰ adena am si na am koro tambu yi deke bo i ti kpa nahore su, na am yo casi na am la ma ngasi be fa ko cen bo Kristo ba kaaki ba ni.

¹¹ Na m susere Nyeme ka Yesu Kristo buka am, na am wo wo kpa, na am suyo sakpa sanja kere, na mine nu i na bu kansi Nyeme na bu wura i kpri.

Yesu Kristo dee ti ye m la ngoo a

¹² M ninbaam, m koro ka am si ka sa bo wo tu m na m wo dansaraka n nu ti ma tie, nyini ma labari kpa n akoro abara aye a.

¹³ Nyini dee ti, tintinijinafom ni minem kere bo bu wo fen n asi ka, m ti Kristo dee amusuisufo dee ti ye m wo dansaraka nu a.

¹⁴ M dansaraka n nu woowa n awura ya ninbaam dongu kpere kekereke Mibi n dee ti, wo ma ba nya ahoresi abuka su bo bu koro sukan labari kpa n jore sanja kere na bu soro ma sere.

¹⁵ Nahore, koresi ni akuruwa se ti, ye bu nbem kan Kristo labari kpa n jore n a, ama, nbem gusu kan i ni akunnu fofoe wo.

¹⁶ Bere n bo bu yo i ni akunnu fofoe ni, Nyeme koro ti ye bu yo so n a, dama bu si ka Nyeme ma

m wo fen a, na m tu ngoni fa ko Kristo labari kpa n jore su.

¹⁷ Nyingam ni, bu kan ma Kristo labari kpa n jore ni bu sunsunni kpa, ama bu bita anyii sunsunni wo, adena bu ma m di wahara dansaraka n nu.

¹⁸ Nyini n kere bo bu suyo i ni, i be mmoo kpie ma m daafiri. Ama, deke bo i yo m fie n la ka, bu ma Kristo labari kpa ni susandi bara ye buka su wo. Nzen bu kan ma i ni bu sunsunni kpa, wara bu kan i ni bu akunnu fofoe, m dee la ka, sangha kere m ahore ti jooa.

¹⁹ Dama m si ka nyemesere bo am sere Nyeme ma m sangha kere n ni buka bo m nya i fite Yesu Kristo Awiewie Casi n do ni, nyini ma m nya m tii a.

²⁰ M fa ahoresi ni tama yo m juma ni anyumboro sangha kere, na ma nyinse ti m, adena nzen m wuuri, ni bo ma wu ma kere, m woowa koro ma mine kansu Kristo dee duma.

²¹ Mini do, nzen m la ngoo, Kristo dee ti a, nzen ma wu, i ti m kpere wo.

²² Ama, nzen m toko la ngoo ahin durunya n nu fen na m koro yo sa bo i kun kpere Nyeme do, nyini yiri, m si ma bo m yi ahin deke nnyom nu.

²³ Ma ka afien ni afien wo, dama m koro ka ma m wu wo na m ko wo Kristo do, m ngu ka nyini n ti ye tara durunya n nu fen bo m wo ni.

²⁴ Ama, nzen m kaaki nie bekun a, ambere dee ti, i ti ye ni ka ma m wu, ama, m wo ni m ngoo durunya n nu fen.

²⁵ To. Nyini dee ti, m si tenle su ka m wu ma kisa, m wo bere wo, na m buka am na am koro yo Kristo yarada ni nahore, na am ahore jo.

²⁶ Adena nzen m ba kaaki ba niɛeri am busu bekun, nyini sanɔa, am lá deke bo am koro fa kansu Yesu Kristo, fa kɔ sa n bo wɔ yo ama m ni.

²⁷ Tɔ, kisa, jɔrɛ kɛrɛ bo i wo bɛrɛ la ka, am ma am woowa ti kabo Kristo labari kpa n kere ka am wo barasu ni, na nzen m ba koro ba niɛeri am busu, wara ma koro aba má n kɛrɛ, na m ti am jɔrɛ ka Awiewiɛ Casi n ma am la jinakun-su, na am la sunsunni kun ni anɔɔsɛ, suboro am nyi sutu ŋgoni kan Kristo labari kpa n jɔrɛ kere minem na bu yo yarada.

²⁸ Na má am soro sere fa kɔ am kpɔfɔm dɔ, am ma am ahore ti siiwa sanɔa kɛrɛ, nyini má bu ŋu nu na bu sí ka bu ká ŋgbɛɛn a, ama, am bɛrɛ yiri, am nyá tiide, dama Nyɛmɛ má am nyá tiide a.

²⁹ Dama Nyɛmɛ ace am aceeri Kristo dɛɛ ti, ka am yo Kristo yarada, má nyini ŋgumi, ama, am kaaki di wahara ma i.

³⁰ Nyini ti, kisa am koro buka m na ya kɛrɛ kun nyini lue ni. Yiri ye am yo ŋuuri ka m tu i ŋgoni n a, ye kisa am ti ka m toko tu i ŋgoni n a.

2

Kabo Yesu Kristo yikofɔ n yoori i ŋu kaan barasu ni

¹ Kristo wo am nu n dɛɛ ti, yiri ma am ahore si a, na i dɛɛ koro bo i fa koro am ni, da am ahore. Am ni Awiewiɛ Casi n la wo fiɛ, am yo sakpa na am si am beŋgum aŋunfo.

² Nyini dɛɛ ti, m sere am wɔ, jande, am kɛrɛ fa sunsunni kun, na am koro am beŋgu, na am fa anɔɔsɛ, na m ahorejɔ kó sin su.

³ Má am sunsun kabo am yo na amberε ηgumi nya i, má am wura am ηu kpiri, ama, am yo am ηu kaan, am bu am benggu ka bu tara am.

⁴ Má am nie kabo am yo na amberε ηgumi yo ye, ama, am nie kabo am yo na am bengum gusu yo ye.

⁵ Am ma am sunsunni ti kabo Yesu Kristo dεε ti barasu ni.

⁶ I woowa ti kabo Nyεmε woowa ti n wɔ sanja kεrε, ama, wɔ se má cεen be ka i tú ηgoni wura i ηu kpiri na i ni Nyεmε se,

⁷ ama, i keteeri nyini n kεrε bo má i ti i dεε n wɔ, na wɔ fa i ηu ayo akɔɔ, na wɔ kaaki adamande. I woowa ti kabo adamande woowa ti barasu n wɔ,

⁸ i yoori i ηu kaan wɔ, na wɔ de Nyεmε nɔanie ni, haari na wɔ wu yiwee tie, yiri la bo bu kpamaari i baka jaanu n su ni.

⁹ Nyini dεε ti, ye Nyεmε awura i kpiri agaya aye i su angoro ama i duma bo i tara duma kεrε n a,

¹⁰ adena mine ni deke kεrε bo bu wo angoro, ni bo bu wo durunya n nu fen, ni bo bu wo asien bu n tiiri Yesu duma ni, bu kútu i na bu sú i.

¹¹ Na sɔnɔ kεrε teke i nɔɔ kan ka Yesu Kristo ti deke n kεrε Mibie a, nyini wura ya Si Nyεmε kpiri a.

Am ma ya woowa ta wein durunya n nu

¹² Nyini dεε ti, m ninbaa koroowam, am yo deeri m nɔanie n wɔ sanja kεrε, kisa bo m wo má am dɔ ni, nyini ti ye ni ka am de m nɔanie n tara kabo m yo wo am dɔ n a. Tiide n bo am anya

i n dæ ti, am yo Nyeme juma n ni anyumboro, bo i kere ka am anya tiide, na am soro Nyeme.

¹³ Dama Nyeme suyo i juma am ahore su a, na i ma am de i noanie ni, na am yo i koroowa.

¹⁴ Deke kere bo am yo i ni, má am nɔɔuti na am se akuruwa,

¹⁵ adena am yo mine casim bo be koro jarki má am, na am yo Nyeme nbaam bo am la má ngasi be na am ma am woowa ti wein, na am wo nyumafɔ satseyofɔ ngbeem n nu, na am ta ka asarambaam.

¹⁶ Na am bita Nyeme noanie ni, yiri ma minem ngɔɔ a. Nzen am yo sɔ, nyini ma m koro bo m hoe fa kɔ am woowa n su a, cɛen n bo Kristo bá kaaki ba ni, na m si ka juma n bo m yiiri anyumboro yoori am nu ni, aka má ngbeem.

¹⁷ Kabo am ayo Kristo yarada, na am sukun am nɔ yo i juma n ni nahore su ni, na haari nzen m wuuri mmɔ na am yarada buka su, m ahore ti jɔwa, na i yo m ni ambere kere fe,

¹⁸ am gusu ma am ahore jɔ kabo m ahore ti jɔwa barasu ni.

Timoti ni Ipaforoditosi jɔre

¹⁹ Nzen ya Mibie Yesu soro su, m la ahoresi ka i cɛ má, m sunma Timoti am dɔ na i ba nie am busu, na i ba kaaki baari, na m gusu tí kabo am wo ti na m ahore da.

²⁰ Deke bo i ti na m sunma i am dɔ n la ka, be cɛcɛ wo má am nu, yiri ngumi ti bo i buka m su bo i cɛcɛ wo am nu a.

²¹ Bo ba ka n kere, bu cɛcɛ wo má Kristo juma n nu, se bu cɛcɛ wo bu sa koroowam nu a.

²² Amberε mmɔɔ ni am tii si ka Timoti woowa kere kabo i su Nyeme atin n su ni nahɔre su, na am si ka m ni yiri sanɔa yo juma kabo baa ni i si bo su yo juma n wɔ, adena mine dɔŋgu de labari kpa ni na bu yo yarada.

²³ Nyini ti, nzen m ŋuuri m jɔre n kere nyaari, m sɔnma i kisa bere na i ba nie am busu.

²⁴ Nzen Mibiε n soro su, m la ahoresi ka i cε má, mini mmɔɔ ni m tii bá nie am busu.

²⁵ Ma ŋu ka, i ti ye ni ka m sɔnma ya niwa Ipaforoditosi am dɔ. M ni yiri sanɔa yo juma na ya ti ka sojam bo bu buka bu beŋgu lue n nu wɔ, ya Mibiε Yesu dεε atin su. Na amberε ni am tii sunmaari i m dɔ, na wɔ ba abuka m ni deke kere bo m koro ni.

²⁶ I wara ado am, ka i ba nie am busu, i ahore akaaki asaaki, dama am yo tiiri ka wɔ da tukpaki.

²⁷ Nahɔre, i tukpaki n wurari i, kaan sɔ, má wɔ wu. Ama, na Nyeme asi i aɔunfo, má yiri ŋgumi, m ni yiri kere, adena má m ahore saaki buka su.

²⁸ Nyini dεε ti, ye m koro ka i ba am dɔ ndende, na am ŋu i na am ahore kaaki jɔ bekun, na má m ahore saaki kun.

²⁹ Am de i ni am saa nnyɔ ni ahorejɔ, Mibiε n dεε ti. Na am bu minem kere bo bu woowa ti kabo i woowa ti barasu ni.

³⁰ Dama Yesu Kristo dεε juma n dεε ti, i yo tɔori i ŋgɔɔ ɔ, má wɔ ka kaan sɔ na i wu. I yoori sɔ ni, adena i buka m na i yo deke n bo am akoro ayo má i ni.

3

Sɔnɔ bo i yo sa bo i kɔ atin su Nyeme dɔ nahɔre

su

¹ M ninbaam, jɔɛ bo i wo bere la ka, am ma am ahore jɔ kabo am ni Mibiɛ n ayo kun ni. I ti ye ni ka m kaaki kɛɛ na m tenge am su fa kɔ kabo m yo kɛɛ seeri am ni, dama i ti deke bo i buka am wɔ, na má am wura kekereke nu.

² Am si am ɲu sa, ni minɛm bo bu ti satieyofom na bu ti ka caam ni, na bu ɲa nzen sonɔ awura má kenkenne, i nya má tiide ni.

³ Yɛɛ ti Nyɛmɛ minɛm bo ba wura kenkenne nahɔɛ su a, má bere, dama Nyɛmɛ Awiewie Casi ni buka ya ye ya koro su Nyɛmɛ na ya la ahorejɔ a, fa kɔ kabo ya ni Yesu Kristo ayo kun ni. Nyini ti, ya daafi má sayoowa be ɲu fa kɔ aɲuniɛmbaa su.

⁴ Mini ni m tii, má m la atin bo m koro se ka m daafi m ɲu fa kɔ sayoowam su. Nzen be ɲa i la atin, na i daafi i ɲu fa kɔ nyini sayoowam su, má m koro se ka, m la atin tara i mi fieo.

⁵ Bu wuuri m ni, m lemɔcɛ cɛɛn bu wuraari m kenkenne wɔ. M ti Yisarelifɔ baa a, na m fite Benjamin dɛɛ lɛɛ anɔ n nu wɔ, na m ti Hiburu-fom anuma a nahɔɛ su. M yo ti Farasifom kun wɔ, na m su Nyɛmɛ nɔaniɛ kpamaawa n su kabo i ti ye ni ka bu su i su barasu ni.

⁶ M yo bita i ni anyumboro wɔ, kabo m yo na m kere Kristo jama n wuwuruwa ni. Fa kɔ kabo sonɔ de Nyɛmɛ nɔaniɛ kpamaawa n na i su i su nahɔɛ su, mini la má ɲgasi be.

⁷ Ama, nyini deke n kere bo m yo buuri bu ka bu la kperɛ ma m ni, Kristo dɛɛ ti, ma ɲu ka bu kere ti ɲgbeen wɔ kisa.

⁸ I ti nahore wo ka, ma nu ka deke n kere ti ngbɛɛn wo, adena m koro si m Mibie Yesu Kristo, yiri tara deke n kere a. Yiri dɛɛ ti, ma yaki deke n kere bo m yo yoori bu n ka bu ti ngbɛɛn wo. M nie bu kere ka wura a, adena m koro de Kristo ni m saa nnyo,

⁹ na m ni yiri yo deke kun nahore su. Kisa m koro se ma ka m yo sa bo i ko atin su Nyeme do, kabo Nyeme noanie kpamaawa n kere ni, ama, kisa, kabo ma yo Kristo yarada n dɛɛ ti, ye Nyeme de m ka m yo sa bo i ko atin su i do a. Deke n bo i ma i de m ka m yo sa bo i ko atin su i do n la bo ma yo i yarada n wo.

¹⁰ Deke bo m koro i n kere la ka, m si Kristo, na m nya i yiko n bo i koro tengeeri i yiwee n nu ni, na m di i dɛɛ wahara n bo i diiri n be, na m wu i dɛɛ yiwee n be.

¹¹ Nyini ma m la tama ka mini gusu tenge m yiwee nu a.

Kabo ya boro ya nyi na ya nya Kristo aceeri ni

¹² M suse ma ka ma du mo aju su na m ti kabo Nyeme koro ka m ti ni, wara ma du mo ayo casi wo, ama, m toko boro m nyi wo, adena m nya deke n bo i ti na Yesu Kristo afa m ayo i dɛɛ sono ni.

¹³ M ninbaam, mini ni m tii suse ma ka ma ju su kabo i koro ka m woowa ti barasu n wo, se deke kun ye m nyunu aboro i su a, m wara afi dekem kere bo m yo yoori bu n sa, ama, m sukoro ka m boro m nyi wo, na m saa kan deke n bo i wo m nyunu ni.

¹⁴ Nyini ti, m mie m nyi wo na m ko m nyunu, adena m ko nu i awieeri, na m nya aceeri n bo

Nyeme afere m ama m ngoo i do ni, Yesu Kristo deɛ ti.

¹⁵ I ti ye ni ka yere kere bo ya yarada ti biiwa ni, ya nyunu boro fa ko nyini dika. Na nzen am sunsunni ba woori i ngungumi, fa ko i noanie n su, Nyeme yi i nyi kere am, na am ti i bu.

¹⁶ Ama, bo i wo bere la ka, kabo ya bita Nyeme atin ba ju haari ni nyuma ni, am ma ya toko bita i so.

¹⁷ M ninbaam, am ma am woowa ti kabo m deɛ n ti barasu ni. Woowa kpa n bo ya du mo afa akere am ni, am nie minem bo bu bita nyini woowa kpa n ni, na am son bu su.

¹⁸ Dama sangha kere m nati se am ka, nbem woowa kere ka bu ti Kristo kpofom wo, fa ko i yiwee n bo i wuuri i baka jaanu n su ni. Ye kisa m kaaki suse am bekun ni nyunvuin n a.

¹⁹ Nyini minem so, bu nyeme la bu kunnu wo, na deke bo ma i ti bu nyinse ni, bu fa nyini fa yo yanfoya. Bu sunsunni kere wo durunya n nu fen nengem ngumi so a, nyini ti, bu awieeri, bu ka ngbeen wo.

²⁰ Ama, yere yiri, ya ti Nyeme dika n bo i wo angoro n nu nbaam wo, ye ya sunminda ya Mibie Yesu Kristo, ya Tiidefo ni, ni anyumboro, ka i fite Nyeme dika n bo i wo angoro n nu ba.

²¹ Na i ba kaaki ya ahin anunie n bo i wu ni, na i ma i yo anunie fofore barasu be bo i ti kabo i deɛ anunie woowa n bo i la jirima n ti barasu ni. I fa i yiko n bo i fa nie deke n kere su ni fa yo nyini kere a.

4

Kabo Pɔɔlu tuuri bu fɔ ni

¹ M ninbaam, m koro am agaya, na m ahore abi ka m ɲu am ni, amɛɛ ti, ye m ahore ti jɔɔwa sanɔa kɛɛ a, amɛɛ ti m kɛɛ bo ma di i m jumayoowa n nu a. Nyini ti, am bita Mibiɛ n dɛɛ atin n ni nahɔɛ su.

² Yuwodiya, ni Sintiki, m sere am wɔ jande, ka, am fa anɔɔsɛ, dama am ti nibaam wɔ, Mibiɛ n dɛɛ ti.

³ Tɔ, wɔɔ gusu bo a ti m matafɔ nahɔɛ su ni, m sere u wɔ, ka, a buka nyini nbara nnyom ni, dama bɛɛ yiiri anyumbo bukaari m, ye ya kaanri labari kpa n jɔɛ n a, fa sanɔa ni Kerementi, ni nyingam bo m ni bɛɛ sanɔa yo juma ni. Nyemɛ akɛɛ bu kɛɛ duma awura ɲɔɔ kadasi n nu.

⁴ Ya Mibiɛ n dɛɛ ti, am ma am ahore jɔ sanɔa kɛɛ, m kaaki suse am bekun wɔ ka, am ma am ahore jɔ.

⁵ Am ma sɔnɔ kɛɛ ɲu ka am ti bɛnɛ, dama Mibiɛ ni káaki ba kisa.

⁶ Má am koko fa kɔ deke be su, ama, am kan am sa bo i ti am miɛɛwa kɛɛ fa kɛɛ Nyemɛ sanɔa kɛɛ, na am sere i, na am da i asi am ahore su.

⁷ Am yoori sɔ, Nyemɛ má am ahoreda bo i la má aɲusu, na i súnɛ am dika fa kɔ am ahore su ni am sunsunni nu, dama am ni Yesu Kristo ayo kun n dɛɛ ti.

⁸ M ninbaam, jɔɛ n bo wɔ ka n la ka, am ma am sunsunni kɛɛ wo dekem bo bu ti kpa, na bu la kansɛ n su. Bɛɛ la deke bo i ti nahɔɛ, ni bo i

la anyunuyi, ni sa bo i ko atin su, ni bo i ti casi, ni bo i ti koro sa, ni bo i la jirima.

⁹ Dekem bo am sɔnsɔn bu fiteeri m do ni, ni bo am deeri m do ni, bere la m noanie ni, ni m sa-yoowa ni, am su bu su na am fa yo juma. Nyeme la ahoreda, yiri wo am do a.

Kabo Pɔɔlu yoori bu anse fa ko bu buka n su ni

¹⁰ Ya Mibie n dee ti, m ahore ajo ako asin su, dama wo ce bo m ti ma am nga, ama, kisa am akaaki akere ka am cee wo m nu. M si ka sangga kere am cee wo m do, se kabo am yo na am buka m n ye am anya ma atin a.

¹¹ Bo m suse so ni, i ti ma ka deke be mie m wo ye m sukan so n a, dama nzen m la i, ni bo m la ma i kere, m si kabo m tara m ngu na m wo barasu.

¹² M si kabo yaari ti sɔno na i ti barasu, na m kaaki si kabo sɔno nya i agaya na i ti barasu. Deke kere bo m wo, na sa be atu m, nzen m di na m kunnu yi o, wara nzen m da aho o, nzen m la nenge beberebe o, wara i ti kaan o, m si kabo m tara m ngu barasu na m nyunu yi i.

¹³ Yesu Kristo maari m fanga n dee ti ye m koro yo deke n kere a.

¹⁴ Ama, am ayo sakpa, kabo mie tuuri m na m ni ambere kere sangga di wahara ni.

¹⁵ Ambere Filipiyafom si ka fite sangga bo m boori i bu ba kaanri labari kpa n jore kereeri am ni, nyini sin, na m ba fiteeri Makedoniya awore n nu ni, Kristo jama kun n kpein be mmoo ace ma m aceeri be, ma ka ambere ngumi ceeri m aceeri a.

¹⁶ Saŋga bo m toko wo Tesalonika miε kpiri n nu ni, na miε tuuri m ni, am yo sunmaari m dɔ ni aceeri kpe nnyɔ.

¹⁷ I ti má ka m koro ka saŋga kere m sude aceeri fite am dɔ ɔ, ama, m koro ka am yo sɔ, na Nyeme yo am kisi.

¹⁸ Deke n kere bo am fa sunmaari m dɔ ni, m saa akan i, am ace m atara kabo má m koro ni mmɔɔ. Kisa m koro má pui kun, dama Ipaforoditosi afa am aceeri n kere aba ama m. I ti ka yoowa bo ba yo i ama Nyeme na wo sun i nu ade i ni akunnujɔ wo.

¹⁹ M Nyeme Feme ni, yiri la nenge ni ajekε kere a, i kere wo Yesu Kristo dεε jirima nu wo, i má am deke kere bo am fun i.

²⁰ Ya Si Nyeme ni, yiri ti ye ni ka ya kansɩ i saŋga kere saŋga. Ami.

Kabo Pɔɔlu yoori bu anse awieeri su ni

²¹ Am bisa Nyeme minem kere dɔŋgu ma m. Bere ti Yesu Kristo dεem a. Ya ninbaam bo bu wo m dɔ fen n bisa am kere dɔŋgu.

²² Nyeme minem kere bisa am dɔŋgu, maala bo bu yo juma Romafom Feme Kpiri Siza dika ni.

²³ Ya Mibiε Yesu Kristo buka am kere.

ΝΥΣΜΕ ΙΟΡΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

fe36d0e6-2a60-5e15-8d1c-8bf275389598